

四庫全書

子部

欽定四庫全書

子部

古今事文類聚別集卷二十三

詳校官中書臣沈 颺

侍讀臣孫球覆勘

總校官編修臣王燕緒

校對官中書臣潘奕萬

謄錄監生臣陳太初

欽定四庫全書

古今事文類聚別集卷二十三

宋 祝穆 撰

人事部

租賦 征商附

羣書要語什一天下之正中

典通

損上益下民說無疆

卦益

征商市廛而不征法而不廛則天下之商皆悅而願出

於其塗矣

孟子

有賤丈夫焉必求龍斷而登之以左右望

而罔市利人皆以為賤故從而征之征商自此賤丈夫

始矣

同上

詩句誰知扣君門令下寬征賦杜田毛樂寬征韓

古今事實

三代取民

夏后氏五十而貢殷人七十而助周人百畝而徹其實
皆什一

魯之取民

魯宣公初稅畝杜預注公田之法十取其一今又履其餘畝復十收一

聚斂之臣

季氏富於周公而求也為之聚斂而附益之子曰小子鳴鼓而攻之

二猶不足

哀公問於有若曰年饑用不足如之何對曰盍徹乎曰二吾猶不足如之何其徹也曰百姓足君孰與不足百

姓不足君孰與足

貪如碩鼠

碩鼠刺重斂也國人刺其君重斂蠶食於民不修其政

貪而畏人若大鼠也

魏風

保障繭絲

趙尹鐸守晉陽鐸曰保障乎繭絲乎

秦之取民

秦始皇內興功作外攘夷狄收秦半之賦發閭左之戍

董仲舒曰秦用商鞅之法力役三十倍於古田租口賦

鹽鐵之利二十倍於古秦廢井田開阡陌

食貨志

秦頭會

箕歛以供軍費財匱力盡

張耳陳餘傳

漢除田租

漢高祖以蜀漢民給軍事勞苦復勿租稅一歲去漢文帝詔賜民田租今年之半景帝令民半出田租三十而稅一也

唐租庸調

唐太宗凡授田者丁歲輸粟二斛稻三升謂之租丁隨鄉所出歲輸租絹一疋綾絁二丈布加五之一綿三兩麻三斤非蠶鄉則輸銀十兩謂之調用人之力歲二十日閏加二日不役者日為絹三尺謂之庸有事而加役二十五日者免調三十日者租調皆免通正役不過五十日水旱霜蝗耗十四者免其租桑麻盡者免其調田耗十之六者免租調耗七者諸役皆免之

唐青苗錢

代宗皇帝詔天下田一畝稅錢十五以國用急不及秋
方苗青則征之號青苗錢

上供送使留州

憲宗分天下之賦以為三一日上供二曰送使三曰留
州

作兩稅法

德宗時楊炎作兩稅法夏輸不及六月秋輸無過十一
月

政拙催科

陽城至道州治民如治家不以簿書介意課當上考功
城自言曰撫字心勞催科政拙考下下

輸租增耗

五代漢王章為二司使往時民租石輸二升為鼠雀耗
章增一石輸二升為二斗

荆公青苗法

荆公知明州鄞縣貸穀于民交息以償新陳相易興學

校嚴保伍邑人便之熙寧所行之法皆本乎此然荆公
知行於一邑則可不知行於天下不可也

邵氏錄

後司馬

光范鎮李常孫覺程顥韓琦蘇軾爭言不便而罷矣

文王不征

以下係
征商

文王之治岐也闔市譏而不征

成王之征

周載師凡任地國宅無征園廛二十而一近郊十一遠
郊二十而三甸稍縣都皆無過十二惟漆林之征二十

而五宅不毛者有里布田不耕者出屋粟民無職事者
出夫家之征

武帝重斂

武帝初筭商車又筭緡錢又令民告緡者以其半與之
注有不輸稅令民得告以半與之又師旅之後用度不
足乃橫興賦斂榷酒酤莞鹽鐵鑄白金造皮幣筭至車
船租及六畜民力屈財用竭

唐德之征

唐陳京請稅富商錢德宗以趙贊判度支搜督甚峻諸道津會置吏閱商錢每緡稅二十竹木茶漆稅十之一以贍常平本錢屬軍用迫蹙不能備常平之積趙贊復請稅間架等除陌及涇原兵反大呼長安市中曰不奪爾戶儼質不稅爾間架除陌矣

食貨志

宋之寬征

宋太祖詔勿得苛留行旅齋裘除貨幣當輸等外不得輒發篋搜索

不稅農器

真宗祥符間呂夷簡請免農器之稅

寧征商賈

仁宗慶曆間議欲弛茶鹽之禁及減商稅范仲淹以為茶鹽商稅之入但分商賈之利爾於商賈未甚有害也今國用未省歲入不可闕既不取之山澤及商賈必取之於農與其害農孰若取之商賈

置市易法

文彥博奏市易司遣官監賣果實有損國體歛民怨乞
寢罷凡衣冠之家圖利於市搢紳清議尚所不容豈有
大國皇皇求利而不為物議所非者乎王安石曰陛下
不殖貨利豈於菓實收數千緡息以規利者直以細民
久困於官中須索又為蕪并所苦故為立法耳

通鑑

罷欄頭稅

孝宗朝或乞復置西溪欄稅上曰關市譏而不征去城

五里之外豈可復欄稅

宋聖政紀

古今文集

雜著

捕蛇者說

柳宗元

永州之野產異蛇黑質白章觸草木盡死以齧人無禦
之者然得而腊之以為餌可以已大風孳蹠痿癘去死
肌殺三虫其始太醫以王命聚之歲賦其二募有能捕
之者當其租入未之人爭奔走焉有蔣氏者專其利三
世矣問之則曰吾祖死於是吾父死於是今吾嗣為之

二十年幾死者數矣言之貌若甚感者余悲之且曰若
毒之乎余將告于涖事者退若役復若賦則何如蔣氏
大感汪然出涕曰君將哀而生之乎則吾斯役之不幸
未若復吾賦不幸之甚也嚮不為斯役則久已病矣自
吾氏三世居是鄉積于今六十歲矣而鄉鄰之生日蹙
殫其地之出竭其廬之入號呼而轉徙饑渴而頓踣觸
風雨犯寒暑呼噓毒癘往往而死者相藉也曩與吾祖
居者今其室十無一焉與吾父居者今其室十無二三

馬與吾居二十年者今其室十無四五焉非死則徙爾而吾以捕蛇獨存悍吏之來吾鄉叫囂乎東西墮突乎南北譁然而駭者雖雞狗不得而寧焉吾恂恂而起視吾缶而吾蛇尚存則弛然而卧謹食之時而獻焉退而日食其土之所有以盡吾齒蓋一歲之犯死者二焉其餘則熙熙而樂豈若吾鄉鄰之旦旦有是哉今雖死于此比吾鄉鄰之死則已後矣又安敢毒耶余聞而愈悲孔子曰苛政猛於虎也吾嘗疑乎是今以蔣氏觀之尤

信嗚呼孰知賦歛之毒有甚於是蛇者乎故為之說以俟夫觀人風者得焉

古詩

重賦

白居易

厚地植桑麻所要濟生民
生理布帛所求活一身
身外充征賦上以奉君親
國家定兩稅本意在憂人
厥初防其淫明勅內外臣
稅外加一物皆以枉法論
奈何歲月久貪吏得因循
浚我以求寵歛索無冬春
織絹未成

足縑絲未盈斤里胥迫我納不許暫逡巡歲暮天地閉
陰風生破村夜深燈火盡霰雪白紛紛幼者形不蔽老
者體無溫悲喘與寒氣併入鼻中辛昨日輸殘稅因窺
管庫門綿帛如山積絲絮如雲屯號為羨餘物隨月獻
至尊奪我身上暖買爾眼前恩進入瓊林庫歲久化為
塵

傷田家

聶夷中

二月賣新絲五月糶新穀醫得眼前瘡剗却心頭肉我

願君王心化作光明燭不照綺羅筵偏照逃亡屋

織婦怨

文與可

擲梭兩肘倦踏籥雙足趺三日不住織一疋纔可剪織
處畏風日剪時審刀尺皆言邊幅好自愛經緯密昨朝
持入庫何事監官怒大字雕印文濃和油墨污父母抱
歸舍拋下中門下相看各無語淚迸若傾瀉質錢解衣
服買絲添上軸不敢輒下機連宵停火燭當湏了租賦
豈暇恤襦袴前知寒切骨甘心扇骨露里脊踞門限叫

罵嗔納晚安得織婦心變作監官眼

田家詞

元結

牛吒吒

許角反

田确确旱塊敲牛蹄趵趵

音剝

種得官倉珠

顆穀六十年來兵簇簇月月之倉糧車轆轆一日官軍
收海服驅牛駕車食羊肉歸來收得牛兩角重鑄鋏作
斤斲姑舂婦擔輸促促輸官不足歸賣屋農死有兒牛
有犢不遣官軍糧不足

打麥

張舜民

打麥打麥彭彭魄魄聲在山南應山北五月太陽出東
北纔離海嶠麥尚青轉到天心麥已熟鷄旦催人夜不
眠竹鷄呼雨雲如墨大婦腰鎌出小婦具筐逐上壠先
將青下壠已成束田家以苦乃為樂敢憚頭枯面焦黑
貴人薦廟已嘗新酒醴雍容會所親曲終饜飫勞童僕
豈信田家未入唇盡將精如輸公賦次把斗升求市人
麥秋正急又秧禾豐歲自少凶歲多田家辛苦可奈何
將此打麥詞兼作插禾歌

野老歌

張籍

老翁家貧在山住耕種山田三四畝
苗疎稅多不得食
輸入官倉化為土歲暮鋤犁倚空室
呼兒登山收橡實
西江賈客珠百斛船中養犬長肉食

田家行

王建

男聲欣欣女顏悅人家不怨言語別
五月雖熱麥風清
簷頭索索綠車鳴野蠶作繭人不取
葉間撲撲秋蛾生
麥收上場絹在軸的是輸得官家足
不望入口復上身

且免向城賣黃犢田家衣食無厚薄不見縣門身即樂

當窻織

王建

歎息復歎息園中有棗行人食貧家女大富家織翁母
隔牆不得力水寒手澁絲脆斷續來續去心腸爛草蟲
促促機下啼兩日催成一匹半輸官上頭有零落姑未
得衣身不着當臆却羨青樓倡十指不動衣盈箱

治盜 偷盜

羣書要語赭衣半道羣盜滿山 賈山至言 斬木為兵揭竿為

旗

賈誼過秦論

大攻城邑小掠鄉里

咸宣傳

殲厥渠魁脅從罔

治

隋征延

及于平民罔不寇賊鴟義姦宄奪攘矯虔刑偷

盜慢藏誨盜

易係

鼠竊狗偷

文集

探囊發篋

劉敞疏

椎埋鼓鑄

秦觀文

詩句兵革身將老關河信不通

杜

涼風動萬里羣盜正

縱橫

杜

託身白刃裏殺人紅塵中

李

軍旅西征急風塵

戰伐多

李

天兵宿西北狂兒尚稽誅

歐

已經百日竄荆

棘身上無有完肌膚

杜

偷盜何況親犴獄敲榜發姦偷

韓
偷兒夜探赤白丸

蘇

古今事實

萑苻之盜

鄭子產有疾謂子太叔曰我死子必為政唯有德者能以寬服民其次莫如猛夫火烈民望而畏之故鮮死焉水懦弱民狎而玩之則多死焉故寬難疾數月而卒太叔為政不忍猛而寬鄭國多盜取人於萑音苻音之澤音澤太叔悔之曰吾早從夫子不及此興徒兵以攻萑苻

之盜盡殺之盜少止仲尼曰善哉政寬則民慢慢則糾
之以猛猛則民殘殘則施之以寬寬以濟猛猛以濟寬
政以是和昭二十

不穫民麥

宓子賤為單父宰齊攻魯父老請曰麥熟請放民皆使
出穫麥宓子不聽曰若使不耕者得穫是使民樂有寇

也
家語

潢池弄兵

宣帝時渤海盜賊並起丞相御史舉龔遂召見對曰海
瀕遐遠不霑聖化其民困於饑寒而吏不恤故使赤子
盜弄陛下兵於潢池中耳今欲使臣勝之耶將安之也
曰選用賢良固欲安之也遂至渤海移書屬縣悉罷捕
盜賊吏有持鉏鉤田器者皆為良民吏無得捕盜賊悉
平民安土樂業民有帶持刀劍者使賣劍買牛賣刀買
犢曰何為帶牛佩犢

探赤白丸

漢尹賞成帝時長安少年羣輩殺吏相與探丸為吏得赤丸者斫武吏得黑丸者斫文吏白者主治喪城中薄暮塵起剽劫行者死傷橫道賞以選守長安令修治獄穿地方深數丈以大石覆其口名為虎穴乃部吏舉長安輕薄惡子得數百人分行收捕賞親閱見十置一其餘盡以次內虎穴中覆以大石數日一發視皆死瘞寺門桓東揭著其姓名百日後令死者家發取其尸長安為之語曰安所求死子桓東少年場生時諒不謹枯骨

後何葬注桓聲如和今猶謂之華表即和表也

綠林赤眉

王莽末民並起為盜賊王鳳馬武王常成丹共聚藏綠
林山中至七八千人樊崇起兵一歲間三萬餘人恐其
衆與莽兵亂乃皆赤其眉以相識別後馮異擊破之

焚書安反側

後漢光武拔邯鄲誅王郎收文書得吏人與郎交關毀
謗者數千章光武不省會諸將燒之曰令反側子自安

黃巾之寇

靈帝時鉅鹿張角以妖術教授徒衆數十萬皆著黃巾
以為幟幟故時人謂之黃巾賊帝遣盧植皇甫嵩集討
賊戰大敗之

賊不入境

後漢韓韶太山賊舉偽號連年不能破韶以三府掾選
為嬴長賊聞其賢不入其境餘縣多被寇盜流入縣界
者甚衆韶開倉賑之主者爭謂不可韶曰長活溝壑之

人以此得罪含笑入地矣太守聞韶德竟無所坐

單車降賊

張綱傳廣陵賊張嬰寇亂十餘年朝廷不能討大將軍
梁冀怨綱曾奏已以為廣陵太守欲因事中之綱單車
之職徑造嬰壘申示國恩嬰初大驚既見綱誠信皆拜
泣曰荒裔愚人不堪侵枉相聚偷生若魚遊釜中喘息
須臾間其實恐投兵之日不免孛戮綱約之以天地誓
之以日月嬰乃降綱在郡卒年三十六綱病吏人咸為

祠祀祈福言千秋萬歲何時復見此君張嬰等制服行
喪

以舌擊賊

晉朱伺字仲文為江夏騎督時西陽夷賊抄掠太守陽
岷每請督將議拒賊計伺獨不言岷曰朱將軍何以不
言伺曰諸人以力擊賊伺惟以舌耳

姊妹遇盜

唐奉天竇氏二女生長草野幼有志操永泰中羣盜數

千人剽掠其村落二女皆有容色長者年十九幼者年十六匿巖穴間曳出之驅迫以前臨壑谷深數百尺其姊先曰吾寧就死義不受辱即投崖下而死盜方驚駭其妹繼之自投折足破面流血羣盜乃捨之而去

兄弟遇盜

見兄弟門

黃巢之亂

黃巢募衆數千以應王仙芝轉寇河南十五州衆遂數萬入蘄黃北掠齊魯入鄆淄沂驅河南山南之民十餘

萬掠淮南寇浙東踰江西破虔吉饒信等州因刊山開道七十里直趨建州僥路圍福州是時閩地諸州皆沒陷桂管進寇廣州攻鄂州轉掠江西再入饒信杭州衆至二十萬攻臨安戍將董昌兵寡不敢戰伏弩射殺賊將賊駭乃還殘宣歙等十五州廣明元年陷睦婺二州濟采石侵揚州悉衆渡淮犯申光穎宋徐兗等州陷東都張承範以彊弩三千防關巢攻關齊克讓戰關外俄而巢至師大呼川谷皆震巢乘黃金輿衛者繡袍華幘

騎士數十萬先後之陷京師自奉明門升太極殿僭即位號大齊求袞冕不得繪弋綈為之取廣明判其文曰唐去丑口而著黃明黃當代唐明年李克用破巢於渭南四年二月克用追巢敗之擒巢愛子巢計感謂林言曰若取吾首獻天子言不忍巢乃自刎不殊言因斬之
函首獻行在

吏貪致盜

淳化間彭山縣令齊元振者貪暴苦民王小波剖其腹

金文四庫全書
卷二十三
一
實之以錢蓋苦其誅求無厭也衆推其妻弟李順為帥
入成都僭號王繼恩討平之

化賊為民

張詠知益州時四郊多壘城門盡閉王繼恩嘗送三十
輩請詠治之詠悉令歸農業繼恩怒詠曰前日李順脅
民為賊今日詠與公化賊為民何不可哉

敗儂智高

廣西源州蠻儂智高反陷十餘州命狄青討儂智高青

敗智高於歸仁鋪

詳見上元門

敗范汝為

達州民范汝為作亂詔孟庾宣撫韓世忠副之次福州福帥程遇請世忠曰宜少休以俟元夕世忠曰吾以元夕凱旋見公矣次年春破殺賊衆范汝為自縊死

盜能却兵

以下係偷盜

齊興兵伐楚子發帥師以當之兵三却楚盡用其計齊師愈強於是市偷進請曰臣有薄伎子發諾而遣之偷

則夜解齊將軍之幃子發使人歸之明日又取其枕子
發又歸之明日又取其簪子發又歸之齊師大駭將軍
曰今日不去楚軍恐取其頭乃還師而去

雖賞不竊

季康子患盜問於孔子孔子對曰苟子之不欲雖賞之
不竊語

雞鳴狗盜

見賓客門

偷長擒盜

張敞守京兆尹市偷盜多敞乃召偷盜酋長數人見之責問因貫其罪令致諸盜以自贖偷長曰今一旦詰府恐諸偷驚駭願權補吏職敞皆以為吏遣歸休置酒小偷悉來賀各飲醉偷長以赭污其身衣裾吏坐里閭閱出者汚赭輒收縛之一日捕得數百人盡行法罪由是市無盜賊

梁上君子

陳寔在鄉閭平心宰物為太丘長有盜夜入其室止於

梁上寔命子孫訓之曰不善之人未必本不慈習與性成如梁上君子是也盜驚自投地寔徐譬之曰視君狀貌不似惡人宜深克己反善然當由貧今遺絹二疋自是一縣無復竊盜

殺賊不顧子

後漢橋玄為太尉以疾罷少子十歲獨游門次卒有三
人劫之登樓就玄求貨有頃司隸率河南尹至恐并殺
其子不欲迫之玄瞑目曰姦人無狀玄豈以一子之命

而縱國賊乎促令兵進玄子亦死玄乞天下凡劫質皆并殺之不得贖以財寶京師劫質不避豪貴於此遂絕

操刀捕賊

吳孫堅年十七與父共載至錢塘會海賊掠取賈人財物於岸上堅操刀上岸東西指麾若分部羅遮賊狀賊見以為官兵捕之散走堅追斬一級父大驚

拊床盜隕

晉祭齋有勇氣聲若震雷嘗有二偷入室齋拊床一呼

二盜俱隕故商浩委以軍鋒馬

可置青瓊

王獻之常夜卧齋中有偷人入其室盜物都盡獻之徐
曰偷兒青瓊我家舊物可特置之羣盜驚走

盜笋及菜

宋會稽郭原平宅上種竹夜有盜其笋者奔走墜溝乃
於溝上立小橋令通鄰里慚愧 武康沈道虔見人竊
其園菜乃自隱逃有竊園後大笋令人止之曰此欲成

林買大笋送與之盜者慚不敢取

罰偷埽街

齊王敬則為吳興守錄得一偷令偷身長埽街路久之令舉舊偷自代諸偷恐皆走境內以清

牆壞致盜

宋有富人大雨牆壞其子曰不築必將有盜暮而果大

亡其財

韓非說難

婦能擊子盜

唐鄭義宗妻盧氏略涉書史事舅姑甚得婦道嘗夜有強盜數十持杖鼓噪踰垣而人家入悉奔竄惟有姑自在室盧冒白刃往至姑側為賊捶擊幾死

盜沒為官戶

隋麥鐵杖驍勇有膂力日行五百里走及奔馬陳建中為羣盜廣州刺史歐陽願俘之以獻沒為官戶配執御傘每罷朝後行百餘里夜至南徐州踰城而入行光火劫盜且還及時仍又執傘如此者十餘度物主識之州

以狀奏帝惜其勇捷誠而釋之煬帝朝與賊戰死

執偷而榜

晏元獻公剛峻簡率盜入其第執而榜之既委頓以送

官扶至門即死

出行錄

託鐘辯盜

陳迷古密直知建州蒲城縣時人有失物捕得莫知的
為盜者迷古乃紿之曰某廟有一鐘能辯盜至靈使人
迎置後閣祠之引羣囚立鐘前自陳不為盜者摸之則

無聲為盜者摸之則有聲述古自率同職禱鐘祭甚肅
祭訖以帷圍之乃陰使人以墨塗良久引囚逐一令引
手入帷摸之出乃驗其手皆有墨惟有一囚無墨訊之
遂承為盜蓋恐鐘有聲不敢摸也此亦古之法出於小

說
筆
談

取劍斷盜足

柳開字仲塗幼驚悟豪勇父顯德末為南縣令有盜入
其室衆不敢動開年十三亟取劍逐之盜踰垣開揮劍

斷其足二指

古今文集

雜著

齊司寇對

程晏

齊境多冠司寇不理景公召司寇讓之反諍公曰請理君朝廷之寇也公曰君廢其職反責我欲辭其責也曰不然君不聞鼯鼠之牙乎食人與百類雖齒盡而不痛俗謂之甘口鼠也魯國之牛聞食其角矣請以是諷焉

牛之寢齧有蚊蚋撓其膚毛必知鼓耳搖尾以揮之及
鼷鼠食之即不知痛也鼠之一牙豈不甚於蚊蚋千嗜
乎以其口甘雖貫心徹骨而不知也况其角乎公誠職
臣以司寇請司朝廷之寇然後司封疆之寇也朝廷之
寇其鼷鼠乎食君之角矣又將貫骨與心也是患大而
君不知也封疆之寇蚊蚋乎但撓君之膚毛耳君將鼓
耳搖尾而揮之是患小而不知大也臣所以急其大而
不知慢其小而得知也景公不喻竟坐司寇以不事晏

子曰司寇死田氏為醜於齊矣

律詩

聞慶州趙縱使君與黨項戰死

杜牧

將軍獨乘鐵驄馬榆溪戰中金僕姑死綏却是古來下
驕將自驚今日無青史文章爭點筆朱門歌舞笑捐軀
誰知我亦輕生者不得君王丈二殳

皇祐中儂賊犯慶州閩郡潰去惟守臣曹覲

死之妻方產子棄之草間亂後訪之尚呱呱

然

元厚之

轉戰譙門日欲晡空拳猶自把戈鈇身乘虎口方安坐
命在鴻毛更疾呼柱下杲卿存斷節袴中杵臼得遺孤
空餘三尺英雄氣不愧西山大丈夫

詩話

作詩贈賊

李涉嘗過九江皖口遇盜問何人從者曰李博士也其

豪首曰若是李涉博士不用剽奪久聞詩名願題一篇
足矣涉贈一絕曰春雨蕭蕭江上村綠林豪客夜知聞
他時不用相迴避世上如今半是君

古詩

以下係
偷盜

次韻子瞻送顧子敦河北運使

黃魯直

儒者給事中顧公甚魁偉經明往行河

平當以經明
禹貢使行河商

畧頗應史勞民又費之國計安能已成功渠有命得人

斯可喜似聞阻飢餘惡少驚閭里啓鑰探銖金奪懷取
姝美部中十盜發一二書奏紙西連魏三河東盡齊四
履此豈小事哉何但徒治水使民皆農桑乃是真儒耳

寄盧同

韓愈

玉川先生洛城裏破屋數間而已矣有奴長鬚不裹頭
有婢赤脚老無齒云昨夜長鬚來下狀隔牆惡少惡

難似每憑屋上下窺瞰渾舍驚怕走折趾憑依婚媾欺
官吏不信令行能禁止先生受屈未嘗語忽此來告良

有以嗟我身為赤縣令操權不用欲何竢立召賊曹呼

五百

俗呼行杖人為五百

盡取鼠輩尸諸市先生又遣長鬚來如

此處置非所喜况又時當長養節都邑未可猛政理先生固是余所畏度量不敢窺涯涘放縱是誰之過歟效尤戮僕愧前史買羊沽酒謝不敏偶逢明月輝桃李先生有意許降臨更遣長鬚致雙鯉

里翁行

陳去非

里翁無人支緩急天雨壞牆百憂集賣衣雇人築得牆

不慮偷兒披戶入夜寒干擗

左表二十八年
注干擗夜行也

不經過偷

兒若來知奈何君不見巴丘古城如培塿魯肅當年萬

人守

古今事文類聚別集卷二十三

欽定四庫全書

古今事文類聚別集卷二十四

宋 祝穆 撰

人事部

慕名 辭名附

羣書要語君子萬夫之望 易高山仰止景行行止 車如

圭如璋令聞令望 卷是以有譽處兮 景行先哲 孝君

子疾沒世而名不稱焉 公衛靈公 靈令聞廣譽施於身所以不

願人之文繡也

孟子子

令名德之興

左宣

君子務積於身則貴

名起之如日月

荀儒效

講聞高義之日久矣

漢武制策

竊高下

風之行

鄒陽書

政自己出天下想聞其風采

霍光傳

天下之

士得一識面者退誇於人以為榮至於游談布衣之賤

往往竊門下之名

歐集

見面不如聞名

傳燈錄

辭名名公器

也不可多取

莊子

大名之下難居

越世家

詩句城中好高髻四方高一尺城中好廣眉四方且半

額城中好大袖四方全疋帛

東漢馬廖傳

誰能齊嶺岑揖君

山嶽德孟落月升屋梁猶疑見顏色杜名高海曲人所

慕荆公平生執鞭最欣慕山谷辭名漸喜交游絕幽居不用

名杜何須身後千載名李直以疎慵招物議休將文字

占時名韓苦藏難沒是詩名坎白頭寧復要時名后山

古今事實

學孔希顏

孟子曰乃所願則學孔子也公孫丑楊子曰希顏之人亦

顏之徒學行

捧心效顰

師金曰西施病心而曠其里之醜人見而美之歸亦捧心而曠其里之富人見之堅閉門而不出貧人見之挈

妻子而去之

莊子

慕蘭

司馬相如慕蘭相如之為人更名相如

季諾

曹丘生曰楚諺曰得黃金百斤不如得季布一諾足下

何以得此聲於梁楚之間哉

暴公威名

暴勝之為直指使素聞雋不疑賢至渤海遣吏請與相見不疑冠進賢冠帶櫛具劍珮環玦褒衣博帶盛服至門上謁勝之開閣延請望見不疑容貌尊嚴衣冠甚偉勝之躡履起迎登堂坐定不疑據地曰竊伏海濱聞暴公子威名舊矣今乃承顏接詞凡為吏太剛則折太柔則廢威之以刑施之以恩然後立功揚名永終天祿勝

之敬納其戒

不見黃生

見別離門

登龍門

李膺獨持風裁以聲名自高士有被其容接者名為登龍門

得御李君

李膺性簡亢無所交接南陽樊陵求為門徒荀爽嘗謁膺因為其御既還喜曰今日得御李君矣其見慕如此

林宗巾

郭林宗遇雨巾一角墊時人乃故折一角以為林宗巾
其見慕如此

所進數賢

陳矯李弼謂陳登曰遠近之論謂明府驕而自矜登曰
夫閨門雍穆有德有行吾敬陳元方兄弟淵源玉潔有
禮有法吾敬華子魚清修疾惡有識有義吾敬趙元達
博聞強記竒材卓犖吾敬孔文舉雄姿傑出有王霸之

略吾敬劉玄德餘子瑣瑣焉足錄所敬如此何驕之有

呂布
傳

披霧覩天

衛瓘見樂廣而竒之曰此人之水鏡見之瑩然若披雲霧而覩青天也

欲識莫致

陶潛江州刺史王弘欲識之不能致潛常往廬山弘令潛故人寵道之齋酒於半道要之及至欣然共飲

會坐不相識

晉荀鳴鶴陸士龍二人未相識因會張華華以其並大才謂曰今日相見可勿作常語陸舉首曰雲間陸士龍荀答曰日下荀鳴鶴陸曰既開青雲覩白雉何不張爾弓挾爾矢張曰荀何遲荀曰本謂是雲龍駢駢今乃山鹿野麋獸微弩強是以發遲一坐撫掌

名譽晚衰

周顛以雅望獲海內盛名後頗以酒失庾亮曰周侯末

年所謂鳳德之衰者也

掩鼻效詠

謝安本能为洛下書生詠有鼻疾故其音濁名流愛其詠而弗能及或掩鼻以效之

願出其門

韓愈上宰相書曰惴惴焉惟恐不得出大賢之門

泰山北斗

自韓愈没其言盛行學者仰之如泰山北斗

本贊

景星鳳凰

韓愈與李渤書朝廷之事引領東望若景星鳳凰之始見爭先覩之為快哉

紫芝眉宇

房琯每見元德秀歎曰見紫芝眉宇使人名利之心都盡

爭令出門下

柳子厚名聲大振一時皆慕與之交諸公要人爭欲令

出我門下交口薦譽之

墓誌

盧前王後

王勃與楊盈川盧照鄰駱賓王皆以文章齊名天下稱
王楊盧駱盈川嘗曰吾愧在盧前恥居王後

草木知名

德宗徙張萬福為豫州刺史曰先帝改爾名正者所以
褒也朕謂江淮草木亦知爾威名因復賜舊名

名下無虛

閻立本見張僧繇舊畫曰名下定無虛士

國史纂要

至洛先訪

邵康節居洛士人之道洛者有不入公府而必之先生

之廬

墓誌

婦孺知名

司馬公光上疏論新法逆陳其利害曰後當如是行之
十年餘無一不如公言者天下傳誦以公為真宰相雖
田父野老皆號司馬公而婦人孺子知其為君實也

行狀

坡詩云兒童誦君實走卒知司馬

名聞宮禁

王樞密疇之夫人梅鼎臣之女也景德初樞密副使梅夫人入萬壽宮內太后問夫人誰家子對曰梅鼎臣女太后笑曰是聖俞家乎由是始知聖俞名聞於宮禁也

歸田錄

解紛辭賞

以下係
辭名

魯仲連為趙卻秦軍欲封仲連仲連辭謝曰所貴於天

下之士排患難解紛亂而不取也即有取者是商賈之事連不忍為也遂辭平原君而去

大名難居

范蠡與勾踐既滅吳以大名之下難以久居為書辭王曰主憂臣勞主辱臣死昔君辱於會稽所以不死為此事也今既雪恥請從會稽之誅勾踐曰孤將與子分國而有之不然將加誅於子蠡曰君行令臣行意乃裘其輕寶珠玉乘舟浮海終不反勾踐表會稽山為蠡奉邑

蠡浮海出齊變姓名鴟夷子皮耕于海畔父子治產居無幾何致產數千金齊人聞其賢以為相曰居家則致千金居官則致卿相布衣之極也久受尊名不祥乃歸相印間行以去止於陶

賣藥避名

後漢韓康字伯休賣藥長安市時有女子從康買藥康守價不移女子怒曰公是韓伯休耶乃不二價乎康歎曰我本欲避名今小女子皆知我何用藥為

逸民傳

恐名太盛

王儉幼篤學手不釋卷賓客或相稱美僧虔曰此兒不
患無名將恐名太盛耳

身不可見

宋纖有遠操不與世交馬岌高尚之士具威儀造馬纖
拒而不見岌歎曰名可聞而身不可見德可仰而形不
可覩吾今而後知先生矣

名不可取

白居易云古人云名者公器不可以多取僕是何者竊時之名已多又欲竊時之富貴為造物者肯兼與之乎况詩人命蹇如陳子昂杜甫各授一拾遺而已

造物忌名

陳搏隱華山幼時戲渭水一青衣媪抱置懷中乳之曰令汝更無嗜欲聰悟過人先生嘗戒門人种放曰子他日遭逢明主名動天闕名者古今美器造物者深忌之天地間無完名子名將有物敗之放晚節侈飾過度營

產滿雍鎬間遂喪清節

玉壺清話

醉人推罵

蘇軾曰得罪以來深自閉塞扁舟草屨放浪山水間與
漁樵雜處往往為醉人所推罵輒自喜漸不為人識平
生親友無一字見及有書與之亦不答自幸庶幾免矣

東坡回李
端叔書

古今文集

雜著

與韓荊州書

白聞天下談士相聚而言曰生不用封萬戶侯但願一識
韓荊州何令人之景慕一至於此耶豈不以有周公之
風躬吐握之事使海內豪俊奔走而歸之一登龍門則
聲譽十倍所以龍盤鳳逸之士皆欲收名定價於君侯
願君侯不以富貴而驕之寒賤而忽之則三千賓中有
毛遂使白得脫穎而出即其人焉今天下以君侯為文
章之司命人物之權衡一經題品便作佳士而君侯何

惜階前盈尺之地不使白揚眉吐氣激昂青雲耶白謀
猷籌畫安能盡矜至於制作積成卷軸則欲塵穢視聽
恐雕蟲小技不合大人若賜觀芻蕘請給以紙墨兼人
書之然後退歸間軒繕寫呈上庶青萍結綠長價於薛
卞之門

盛名難居

房瑄贊曰唐名臣多言瑄德器有王佐材而史載行事
亦少貶矣一舉喪師訖而復振原瑄以忠義自奮片言

悟主而取宰相必有以過人者特違所長遂無成功然
盛名之下為難居矣夫名盛則責望備實不副則訾咎
深使瑄遭時承平從容帷幄不失為名宰而倉卒濟難
事敗隙生陷於浮虛比周之罪名之為累也戒哉

律詩

獻僕射相公

白居易

清如冰玉重如山百辟嚴趨禮絕攀
強虜外聞須破膽
平人長說盡開顏
朝廷有道青春好
門館無私白日閒

致却垂衣更何事幾多詩句詠間關

迎候

羣書要語主人肅客而入

禮曲

僮僕歡迎稚子候門陶集趨

拜送迎

韓信傳

詩句踈慵寡將迎

柳坡

過家父老喜出郭壺漿迎坡世人

無往復鄉老有邀迎

坡

客至從嗔不出迎

杜

昔年結客

曾遊處今見焚香夾道迎

歐

道左旌旗諸將列馬前弓

劍六蕃迎

歐

古今事實

敢犒從者

寡君聞吾子將步師出於敝邑敢犒從者不腆敝邑為從者之淹居則具一日之積行則備一夕之衛

襄二
十一

避席爭席

莊子曰陽子居西遊於秦遇老子老子曰而睢睢而盱盱而誰與居太白若辱盛德若不足陽子居蹙然變容其往也舍者將迎其家公執席妻執巾櫛舍者避席煬

者避竈

言其尊形自變故避之

其反也舍者與之爭席矣

去其矜夸故也

虛左自迎

魏公子信陵君置酒大會賓客坐定從車騎虛左自迎侯生侯生直上載公子上坐不讓公子執轡愈恭侯生曰臣有客在市屠中願往車騎過之公子引車入市侯生下見其客朱亥故久立語微察公子顏色愈和乃就車酒酣侯生曰今日嬴之為公子亦足矣嬴乃夷門抱關者也公子自迎於衆人廣坐之中欲就公子之名故

久立公子市中人皆以贏為小人以公子為長者也侯
生因進朱亥曰屠者朱亥賢者舉世莫能知故隱屠間

耳

史記

負弩前驅

漢司馬相如武帝時邛笮君長願為臣妾請吏比南夷
上拜相如為郎將建節徃使至蜀太守以下郊迎縣令
負弩矢先驅蜀人以為寵

謝絕迎者

主父偃為齊相君昆弟賓客散五百金與之曰始貧時
昆弟不我內今吾相齊諸君迎我或千里吾與諸君絕
矣無復入偃之門

竹馬郎迎

郭伋為刺史行部到西河美稷有兒童數百各騎竹馬
於道以迎拜曰聞使君到故喜來迎

故友親迎

范式為荊州刺史友人南陽孔嵩家貧親老乃變姓名

傭為新野阿里街卒式行部到新野而縣選嵩為道驕
迎式式見而識之呼嵩把臂謂曰非孔仲山耶對之嘆
息語及平生勅縣代嵩嵩以為先傭未久不肯去

後漢華嶠

倒屣出迎

蔡邕見王粲而奇之時邕才學顯著貴重朝廷常車騎
填門富客盈坐聞粲在門倒屣迎之

後漢

逢迎

段會宗傳康居太子欲降漢遣衛司馬逢迎

迎迓

唐王諤傳回鶻入朝諤悉軍迎迓

于放反
迎也

望塵迎拜

石崇與潘岳諂事賈謚每候其出輒望塵雅拜

本傳

門生出迎

見門
生門

迎一逢掖

皇甫規歸安定曰王符在門規素聞符名乃驚遽而起
衣不及帶屣屣出迎援符手而還與同坐極歡先是鴈

門太守至規不禮時人為之語曰徒見二千石不如一
逢掖

責不郊迎

竇參按江淮獄揚州節度使陳少游偃蹇不郊迎遣軍
吏致問參厲辭譙責少游慙往謁參參不顧即去

古今文集

雜著

送鄭尚書序

韓愈

嶺之南其州七十其二十二隸嶺南節度府其四十餘
分四府府各置帥然獨嶺南節度為大府大府帥如至
四府必使其佐問起居謝守地不得即賀以為禮歲時
必遣賀問致水土物大府帥或道過其府必戎服左握
刀右屬弓矢帕首袴鞞迎于郊

送幽州李端公序

韓愈

元年春今相國李公藩為吏部員外郎愈嘗與偕朝道
語幽州司徒公劉儕之賢曰某前年被召告禮幽州入其

地迓勞之使里至每進益恭及郊司徒公紅帕首鞞袴
握刀左右雜佩弓韞服矢挿房俯立迎道左某禮辭曰
公天子之宰禮不可如是及府又以其服即事某又曰
公三公不可以將服承命及館又如是卒不得辭云云
今李公既朝夕左右端公歲時來壽其親端公李益也
宰相睽之子
登進士第幽州
劉濟辟為從事其為人佐甚忠意欲司徒公功名流千
萬歲請以愈言為使歸之獻

律詩

自成都召還華山寄陳希夷 張復之

世人大抵重官榮見我西歸夾道迎應被華山高士笑
天真喪盡得虛名

餞送

羣書要語大馭掌馭王路以祀及犯輶夏祖而舍輶飲

酒於其側曰餞重始有事於道也左傳祖道之際是作一

土堆置大羊於其上祭畢而以車碾從上過衆行者險
阻之患如周禮祀輶是也又云祭畢則以胙肉食之謂

之餞禮用兵時用犯軍法當斬底人斬於路却兵過其

中

朱語錄

百兩將之詩

送朋友以言餞行

谷永與段會宗書

子交

手兮東行送美人兮南浦

九歌

春草碧色春水綠波送君

南浦傷如之何

江淹別賦

長安東灞橋迎來送去皆至此故

呼為銷魂橋

開元遺事

漢朝卿士供帳餞於東都晉國名賢

傾城祖於西郭

詩句傾城遠追送餞我千里道

孫子荆征西詩

六樂陳廣坐祖

帳揚春風

鮑明遠

衣冠列祖道

劉長卿

二天開寵餞五馬爛

生光杜邊城有餘力早寄從軍詩杜題詩得秀句札翰

時相投杜為問南溪竹抽梢合過墻杜臨分出苦語願

子書之笏坡惟應故山夢隨子到吾廬坡如何風雪裏

更逞獨歸人坡南鴈正北來早寄詩千首山谷南尋禹穴

見李白道甫問訊今如何杜鳴笛急吹催落日清歌緩

送感行人韓若見孟公投轄飲莫忘衝雪送君行坡憑

君說與髯參軍衰鬢相逢不相識坡青燈白酒留故人

莫愛一醉至曉角

古今事實

祖道神

黃帝之子纍祖好遠遊而死於道故後人祭以為行神也祖祭因饗飲也共工氏曰修好遠遊祀以為神祖漢以午日祖

餞以百壺

韓侯出祖出宿于屠顯父餞之清酒百壺注祖將去而犯輶也既覲而反國必祖者尊其所往去則如始行焉

祖於國外畢乃出宿

韓奕

送人以言

孔子適周見老子辭去老子曰吾聞富貴者送人以財
仁人者送人以言吾不能富貴竊仁人之號聰明深察
而近於死者好議人者也博辯廣大而危其身者好發
人之惡者為人子者不可以有已為人臣者不可以有

已

史記

遠行以贖

見辭受門

六卿郊餞

鄭六卿餞宣子于郊

昭十六

送荆軻

荆軻將行太子及賓客知其事者二十餘人皆白衣冠

以送之至易水之上既祖取道高漸離擊筑荆軻和歌

以濮上聲士皆流涕

春秋後語

祖二疏

見致仕門

客歌驪駒

見燕飲門

不許出郭

陳蕃為豫章太守性峻不接賓客徵為尚書令送者不

出郭

不過虎溪

見道士門

追送出界

郭奕字大業為野王令羊祜常過之奕歎曰羊叔子何必減郭大業少選復往歎曰羊叔子去人遠矣遂送祜出界數百里坐此免官

晉史

為鬼揶揄

羅友答桓温曰旦出門逢一鬼大揶揄云我祇見汝送人作郡何以不見人送汝出郡

世說

自送吏部

宋何尚之字彥德為吏部郎告休定省傾朝送別其父叔度曰此是送吏部郎耳非關何彥德也

共到前亭

王真為漢陽太守范丹於道候別之真曰可共到前亭

宿息以叙分隔

謝承後漢書

送不越閭

齊沈顛不尚浮華從叔敦仕宋貴顯每還吳興賓客填
茵顛不至其門敦就之顛送迎不越閭敦曰吾今乃知
貴不如賤也

並不出門

城陽太守梁柳皇甫謐從姑子也之官有勸謐餞之謐
曰柳為布衣送迎不出門食不過鹽菜貧不以酒肉為

禮今作郡送之是貴城陽太守而賤柳豈中古之人情
非吾心所安也

遭劾亦送

唐陽憑為京兆尹御史中丞李夷簡劾之貶臨賀尉獨
所善客徐晦至藍田慰餞權德輿曰君送臨賀誠厚無
乃為累乎晦曰方布衣時臨賀知我今忍遠棄邪有如
公異時為姦邪譖斥又可爾乎夷簡聞之表為御史曰
君不負楊臨賀肯負國乎

賦詩祖道

張柬之授襄州刺史中宗為賦詩祖道又詔羣臣餞定鼎門外

百官班餞

李光顏復還忠武宰相百官班餞帝御通化門臨送

羣公追餞

柳宗元送苑論登第歸序羣公追餞於灞陵列筵而觴送遠之賦圭璋交映矣

送別遭劾

東坡出知杭州道由南京后山時為徐州教授告徐守
孫覺願往見而覺不之許乃託疾謁告來南京送別同
舟東下至宿而歸後為劉安世所彈

古今文集

律詩

送柳淳入關

孟郊

青山輟為塵白日無閒人自古推高車爭利西入秦王

門與侯門待富不待貧空齋一束書獨濟誰相親

山中送從叔簡

孟郊

莫以手中瓊言邀世上名莫以山中迹久向人間行
松栢有霜操風泉無俗聲應憐枯朽質驚此別離情

送韓愈從軍

孟郊

志士感恩起變衣非變性親賓改舊觀僮僕生新敬
坐作羣書吟行為孤劍詠始知出處心不失平生正
淒淒天地秋凜凜軍馬令驛葬時一飛物色極四靜
王師既

不戰廟畫在無競王粲有所依元瑜初應命一章論檄
明百萬心氣定今朝旗鼓前笑別丈夫盛

送石洪處士往河陽幕

見隱逸門詩話

送李礎判官歸湖南

韓愈

長沙入楚深洞庭值秋晚人隨鴻鴈少江共蒹葭遠歷
歷余所經悠悠子當返孤游懷耿介旅宿夢婉婉風土
雅殊音魚蝦日異飯親交俱在此誰與同息偃

送蘇公知杭州

陳無已

平生羊荊州追送不作遠豈不畏簡書放麈誠不忍一
代不數人百年能幾見昔如馬口銜今作禁門鍵一雨
五月涼中霄大江滿風帆目力短江空歲年晚

謂遲暮不及再

見也

送河南皇甫少尹赴絳州 劉禹錫

祖帳臨周道前旌指晉城午橋羣吏散亥字老人迎詩
酒每同樂別離方見情從茲洛陽社吟詠欠書生

送遠

張籍

日日望鄉國空歌白紵詞常因送人處憶得別家時失意還獨語多愁自不知客亭門外柳折盡向南枝

送人南中訪舊知

喻坦之

春盡火方遊思君便白頭地蒸川有毒天暖樹無秋水接三巴險猿分五嶺愁為緣知己分南國必淹留

送揚子

岑參

斗酒渭城邊壚頭耐醉眠梨花千樹雪楊葉萬條烟惜別添壺酒臨歧贈馬鞭看君賴上去新月到家圓

送蕭李二郎中兼中丞充京西京北覆糧使

岑參

霜簡映金章相輝同舍郎天威巡虎落星使出駕行樽
組成全策京城聞見糧歸來虜塵滅畫地奏明光

送人赴安西

上馬帶吳鉤翩翩度隴頭小來思報國不是愛封侯萬
里鄉為夢三邊月作愁早須清點虜無事莫經秋

奉送裴司徒令公自東都留守再命太原

星使出關東兵符賜上公山河歸舊國管籥換離宮行
色旌旗動軍聲鼓角雄愛棠餘故吏騎竹見新童漢豐
三秋靜胡沙萬里空其如天下望旦夕詠清風

送令狐相公自僕射出鎮南梁

劉禹錫

夏木正陰茂戎裘出帝京沾襟辭闕淚回首別鄉情雲
樹褒中路風煙漢上城前旌轉谷去後騎踏橋聲久領
鵝行重無嫌虎節輕終當持一筆再入福蒼生

陽關三疊

王維

渭城朝雨裊輕塵，客舍青青柳色新。
勸君更盡一杯酒，西出陽關無故人。

送李侍郎赴常州

賈至

雪晴雲散北風寒，楚水吳山道路難。
今日送君須盡醉，明朝相憶路漫漫。

送呂晦叔赴河陽

程伯淳


曉日都門颺旆旌，晚風鏡吹入三城。
知公再為蒼生起。

不是尋常刺史行

送司馬君實

程伯淳

二龍閒卧洛波清今日都門獨餞行願得賢人均出處
始知深意在蒼生



古今事文類聚別集卷二十四

欽定四庫全書

子部

古今事文類聚別集卷二十五

詳校官中書臣沈颺

侍讀臣孫球覆勘

總校官編修臣王燕緒

校對官中書臣潘奕雋

謄錄監生臣莊承簪

欽定四庫全書

古今事文類聚別集卷二十五

宋 祝穆 撰

人事部

行旅

羣書要語旅瑣瑣注瑣細小也最處下極寄旅不得所

安而為厮賤之役所取致災卦旅即次懷其資得僮僕

貞上同旅而無所容故受之以巽巽者入也注旅而無所

容以巽則得所入也

卦序

載脂載牽還車言邁

水泉

星言夙

駕

定之方中

今者闕然數日不見車馬有行色

莊盜跖

適百里

者宿春適千里者三月聚糧

莊子

跋履山川踰越險阻

左成

二征夫勞于周行

楚詞

僕夫悲予懷兮馬蜷局而不行

楚詞

日既西頽車殆馬煩

洛神賦

裹足入秦

李斯書

已業行

畢敬傳

蒙霜露沐風雨

淮南王傳

賜祿秩以辦裘

龔勝傳

櫛風沐雨多

在道路文選行旅不齋糧

唐太宗紀

繭足千里

劉錫

膏吾車兮

秣吾馬

韓文

行李之李字人姓之外更無別義左傳行李

之往來杜不究意理注云行李使人也今遠行結束次第謂之行李而不悟是行使耳按舊文使字作岑傳寫

誤作李

資暇集

詩句誰能久京洛緇塵染素衣謝玄暉夜聞漢使歸獨向

刀頭泣從軍行馬是賒來貴童因倩得頑姚合慈母手中線

游子身上衣孟平生未到處落日獨行時張喬長為萬里

客有愧百年身杜旋呵鞭手凍粘鬚羅鄴朝遊九城陌肥

馬香車欺殺客暮宿五侯門殘茶冷酒愁殺人李白

古今事實

迷途莫問

黃帝將見大隗于具茨之山方明為御昌寓駢乘張若
習朋前馬昆閻滑稽後車至於襄城之野七聖皆迷無
所問途疏大隗至人也

莊子

異鄉見似人

子不聞夫越之流人乎去國數日見其所知而喜去國
旬月見所嘗見於國中者而喜及期年也見似人而喜

矣不亦去人滋久思人滋深乎夫逃虛空者藜藿挂乎
鼯鼯之徑跟位其空聞人足音跼然而喜矣况乎有昆
弟親戚譽欬於其仄者乎莊子

百舍重趼

士成綺見老子百舍重趼也而不敢息莊天

就國夜行

師尚父就國道宿行遲逆旅之人曰吾聞時難得而易
失客寢處安殆非就封者也太公聞之夜衣而行至國

萊侯來伐與之爭營丘

史記

躡蹻擔簦

虞卿躡蹻擔簦說趙王注簦笠有柄者

思歸不忘

漢書韓王信報柴將軍曰僕之思歸如痿人不忘起盲者不忘顧勢不可耳

微行被辱

漢武帝嘗至柏谷夜投亭宿亭長不內乃宿於逆旅逆

旅公謂上曰汝長大多力當勤稼穡何忽帶劍羣聚夜行動衆此不欲為盜則淫耳上默然不應因乞漿飲翁曰吾止有溺無漿也有頃還內上使人覘之見翁方要少年十餘人皆持弓矢刀劍令主人嫗出安過客嫗歸請其翁曰吾觀此丈夫乃非常人也且亦有備不可曷也不如因禮之其夫曰此易與耳鳴鼓會衆討此羣盜何憂不尅嫗曰且安之令其眠乃可曷也翁從之時上從者十餘人既聞其謀皆懼勸上夜去上曰去必致禍

不如且止以安之有頃姬出謂上曰諸公子不聞主人之言乎此翁好飲酒狂悖不足計也令日具今公子安眠無他姬因還內時天寒姬酌酒多與其夫諸少年皆醉姬出謝客殺雞作食平明上去是日還宮乃召逆旅夫妻見之賜姬金十斤其夫為羽林郎自是懲戒希復

微行

漢武故事

隨牒遠方

匡衡曰但以無階朝廷故隨牒在遠方注謂隨補選之

常牒不被超擢也

萍浮南北

鄭康成萍浮南北黃巾為害復歸邦鄉

宿處輒掃

郭林宗每行宿逆旅輒躬洒掃及明去後人至見之曰
此必郭有道昨宿處也

夜宿古冢

陸雲嘗行逗宿故人家夜暗迷路莫知所從忽望見草

中有火光於是趨之至一家便寄宿見一少年美風姿
共談老子辭致深遠向曉辭去行十里至故人家云此
數里中無人居却尋即宿處乃王弼冢雲本無玄學自

此談老殊進

本傳

途窮而哭

阮籍率意獨駕不由徑路車跡所窮輒慟哭而返

富恡儻錢

平陵士孫奮富聞京師性儉恡嘗宿客舍雇錢直甚少

主人曰君惜錢如此欲作士孫景卿耶

三輔
決錄

新豐逆旅

馬周留客汴為浚儀令崔賢所辱遂感激而西舍新豐
逆旅主人不之顧周命酒一斗八升悠然獨酌衆異之

古今文集

雜著

子長遊贈蓋邦式序

馬子才

子友蓋邦式嘗為予言司馬子長之文章有奇偉氣切

有志於斯文也子其為說以贈我子謂子長之文章不在書學者每以書求之則終身不知其竒予有史記一部在天下名山大川壯麗竒怪之處將與子周遊而歷覽之庶幾可以知此文矣子長生平喜遊方少年自負之時足跡不肯一日休非直為景物役也將以盡天下大觀以助吾氣然後吐而為書則其平生所嘗遊者皆在焉南浮長淮沂大江見狂瀾驚波陰風怒號逆走而橫擊故其文奔放而浩漫望雲夢洞庭之陂彭蠡之瀦

混太虛呼噓萬壑而不見介量故其文停瀟而淵深見
九疑之芊綿巫山之崖峩陽臺朝雲蒼梧暮煙態度無
定靡曼綽約春粧如濃秋飭如薄故其文妍媚而蔚紆
泛沅渡湘弔大夫之冤悼妃子之恨竹上猶有斑斑而
不知魚腹之骨尚無恙者乎故其文感憤而傷激比過
大梁之墟觀楚漢之戰場想見項羽之喑鳴高帝之慢
罵龍跳虎躍千兵萬馬大弓長戟俱遊而齊乎故其文
雄勇猛健使人心悸而膽栗世家龍門念神禹之鬼功

西使巴蜀跨劍閣之鳥道上有摩雲之崖不見斧鑿之痕故其文蘄絕峻拔而不可攀躋講業齊魯之都覩夫子之遺風鄉射鄒嶧彷徨乎汶陽洙泗之上故其文典重溫雅有似乎正人君子之容貌凡天地之間萬物之變可驚可愕可以娛心使人憂使人悲者子長盡取而為文章是以變化出沒如萬象供四時而無窮今於其書而觀之豈不信矣予謂欲學子長之為文先學其遊可也不知學遊以采奇而欲操筆弄舉紐綴腐然者乃

其常常耳昔公孫氏善舞劍而學書者得之乃入於神
庖丁氏善操刀而養生者得之乃極其妙事固有殊類
而相感者其意同故也今天下之絕蹤詭觀何以異於
昔子果能為我遊者乎吾欲觀子矣醉把盃酒可以吞
江南吳越之清風拂劍長嘯可以吸燕趙秦隴之勁氣
然後歸而治文著書子畏子長乎子畏子乎不然斷
編敗冊朝吟而暮誦之吾不知所得矣

古詩

途中

白居易

早起上肩拊一盃
平旦醉晚憇下肩
拊一覺殘春睡身
不經營物心不思
量事但恐綺與紈
只如吾氣味

長安秋夕

戎昱

八月更漏長
愁人起常早
閉門寂無事
滿地生秋草
昨宵西窓夢
先入荆南道
遠客歸去來
在家貧亦好

早行

孔文仲

客興謂已旦
出視見落月
瘦馬入荒陂
霜花重如雪
海

風吹萬里兩耳凍幾脫歲晏已苦寒近北尤凜冽况當
清曉行溯此原野濶笠飛帶繞頭指強不得結農家煙
火微炙手麤可熱豈能迓我留而就苟且活仰頭視四
宇夜氣亦漸豁苦心待正晝回日想不缺

遠遊篇

十九
歲作

朱元晦

舉坐且停酒聽我歌遠遊遠遊何所至咫尺視九州九
州何茫茫環海以為疆上有孤鳳翔下有神駒驥孰能
不憚遠為我遊其方為子奉尊酒擊手缺歌慨慷送子臨

大路寒日為無光悲風來遠壑執手空徬徨問子何所
之行矣戒關梁世路百險艱出門始憂傷東征憂暘谷
西遊畏羊腸南轅犯瘴毒北駕風裂裳願子馳堅車躡
險摧其剄我我既不支瑣瑣誰能當朝登南樓道莫宿
臨太行睥睨即萬里超忽凌八荒無為蹙躡者終日守
空堂

行路難

張籍

湘東行人長歎息十年離家歸未得敝裘羸馬苦難行

僮僕盡飢少筋力君不見牀頭黃金盡壯士無顏色龍
蟠泥中未有雲不能生彼昇天翼

羲和謠

楊廷秀

中秋夜宿辟邪市詰朝早起曉星已上日
欲出而月未落光景萬變蓋天下奇觀也
作羲和謠以紀之

羲和夢破欲啓行紫金畢逋啼一聲聲從天上落人世
千村萬落雞爭鳴素娥西征未歸去簸弄銀盤浣風露

一丸玉彈東飛來打落桂林雪
毛兔誰將紅錦幕半天
赤光絳氣貫山川須臾却駕丹砂轂
推上寒空輾蒼玉
詩翁已行十里強義和早起道無雙

律詩

河陽道中

李洞

衝風仍躡凍提轡手頻呵
翻憶江濤裏船中睡蓋蓑

途中早發

劉禹錫

中庭望啓明促促事晨征
寒樹鳥初動霜橋人未行
水

流白煙起日上綵霞生
隱士應高枕無人問姓名

商山早行

溫庭筠

晨起動征鐸客行悲故鄉
雞聲茅店月人跡板橋霜
槲葉落山路枳花明
驛牆因思杜陵夢
鳧鴈滿迴塘

秋江晚泊

杜荀鶴

一望一蒼然蕭騷向暮天
遠山橫落日歸鳥度平川
家是去年別月當今夜
圓漁翁似相伴徹曉葦叢邊

早行

賈島

早起赴前程，鄰雞尚未鳴。
主人燈下別，羸馬月中行。
踏石新霜滑，穿林宿鳥驚。
遠山鐘動後，曙色漸分明。

早行

許渾

失枕驚先起，人家半夢中。
聞雞憑早晏，占斗認西東。
欒濕知行露，衣單覺曉風。
秋陽弄光影，忽吐半林紅。

絕句

李義山

君問歸期未有期，巴山夜雨漲秋池。
何當共剪西窗燭，却話巴山夜雨時。

渡桑乾

賈島

客舍并州三十霜，歸心日夜憶咸陽。
無端更渡桑乾水，却望并州是故鄉。

醉後

劉商

春草秋風老此身，一瓢長醉任家貧。
醒來遠愛浮萍草，漂寄官河不屬人。

秋霖夜憶家

韓偓

垂老何時見弟兄，背燈愁泣到天明。
不知短髮能多少

一滴秋霖白一莖

尤溪道中

韓偓

水自潺湲日自斜
盡無雞犬有鳴鴉
千村萬落如寒食
不見人煙空見花

早發

羅隱

北去南來無定居
此生計竟何如
酷憐一覺平明睡
長被雞聲惡破除

看花

羅鄴

花開只恐看來遲
及到愁如未看時
家在楚鄉身在蜀
一年春色負歸期

行次

前人

終日長程復短程
一山行盡一山青
路傍君子莫相笑
天上由來有客星

題驛舍

盧秉

青衫白髮病將軍
旋糴黃糧買酒樽
但得有錢留客醉
也勝騎馬傍人門

宿濟州西門外旅館

晁端友

寒林殘日欲棲烏
壁裏青燈乍有無
小雨愔愔人假寐
卧聽疲馬啣殘芻

秋雨

張復之

簾幙蕭蕭竹院深
客懷孤寂伴燈吟
無端一夜空階雨
滴破思鄉萬里心

次韻王稚川客舍

黃魯直

五更歸夢嘗苦短
一寸客愁無奈多
慈母每占烏鵲喜

家人應賦虞彥歌

王稚川既得官都下有所盼未歸予戲作林

夫人稚川妻欵乃歌二章與之

黃魯直

花上盈盈人不歸
棗下纂纂實已垂
臘雪在時聽馬嘶
長安城中花片飛
從師學道魚千里
蓋世功名黍一炊
日日倚門人不見
看盡林烏反哺兒

春夕旅懷

崔塗

水流花謝兩無情，送盡東風過楚城。
蝴蝶夢中家萬里，杜鵑枝上月三更。
故園書動經年絕，華髮春惟兩鬢生。
自是不歸歸便得，五湖煙景有誰爭。

倦客

鄭谷

十年五年岐路中，千里萬里西復東。
疋馬愁衝晚村雪，孤舟悶阻春江風。
達士由來知道在，昔賢何必笑途窮。
閒烹蘆笋炊菰米，會向漁鄉作醉翁。

舟行即事

杜荀鶴

年少髭鬚雪欲侵別家三日幾般心朝隨賈客憂風色
夜逐漁翁宿葦林秋水鷺飛紅蓼晚暮山猿叫白雲深
重陽酒熟茱萸紫却向江頭倚棹吟

秋日旅中

杜荀鶴

浮宦浮名能幾何致身流落向天涯少年心壯輕為客
一日病來思在家經雨凍蟬隨葉墮過湖秋鴈趁雲斜
前程雖有投人處爭奈鄉閭日漸賒

容川旅居寄蕭郎中

周林

英華

扣店茅軒向水開東頭舍賃一徘徊窓吟苦為秋江靜
枕夢驚殘曉角催隣舍見愁賒酒與主人知去索錢來
眼看白筆為霖雨肯使紅鱗便曝腮

別離

羣書要語遵大路兮摻執子之手兮詩歌驪駒其辭云

驪駒在門僕夫具存驪駒在路僕夫整駕詩悲莫悲兮

生別離楚辭僚慄兮若遠行登山臨水兮送將歸同問何

潤諸葛
豐傳

詩句嬌兒不離膝畏我却復去杜契濶阻風期荏苒成

雨別

及獨孤

索居動經秋載笑知曷月同漸消酒色朱顏

淺欲語離情翠黛低

張籍

古今事實

孔子贈言

子路將行辭於孔子孔子曰贈以帛乎贈汝以言乎對曰請以言孔子曰不強不達不勞無功不忠無親不信無復不恭無禮謹此五者而已矣子路曰願終身奉之

家語

老子贈言

孔子去周而老子送之曰吾聞富貴送人以金仁者送人以言吾雖不能富貴而竊仁者之號請送子以言凡當世之聰明深察而近於死者好議者也博辯宏大而危其身者好發人之惡者也孔子曰敬奉教也

家語

晏子贈言

曾子行晏子從於郊曰嬰聞之君子贈人以言庶人贈

人以財請假於君子贈吾子以言

荀夫略

離羣索居

子夏曰吾離羣而索居亦已久矣

乃若婦人

子高遊趙平原君客有鄒文李節者與相友善及將還魯諸故人訣既畢文節送行三宿臨別文節流涕交頤子高徒握手而已分背就路其徒問先生與彼二子書披有戀戀之心而先生厲聲高揖始無乃非親之謂乎

高曰始吾謂此二子丈夫耳今乃知其婦人人生有四
方之志豈鹿豕哉而嘗羣聚乎

孔叢子

贈以不拜

陳遵使匈奴過辭於王丹丹謂遵曰但遭世反覆唯我
二人為天地所遺今子當之絕域無以相贈贈子以不
拜遂揖而別遵甚喜

東觀漢記

不見黃生

後漢黃憲字叔度同郡陳蕃周舉相謂曰時月之間不

見黃生則鄙吝之萌復存於心 唐賀知章陸象先曰
季真清談風流吾一日不見則鄙吝生矣

士別三日

呂蒙曰士別三日則刮目相待

吳志

覩物思人

王猛將行造慕容垂飲酒從容謂垂曰今當遠別何以

贈我使我覩物思人

晉海西
公下

相別作惡

謝安嘗謂王羲之曰中年傷於哀樂與親朋別輒作數日惡羲之曰年在桑榆自然至此常恐兒輩覺損其歡

樂之趣

王羲之傳

夜宿誰家

宋選送弟入洛登舟挂席東下選凝佇久之語細君曰帆過南浦今夜清風明月宿水澗誰家

古今文集

雜著

別賦

江文通

黯然銷魂者唯別而已矣况秦吳兮絕國復燕宋兮千里或春苔兮始生乍秋風兮暫起是以行子腸斷百感悽惻風蕭蕭而異響雲漫漫而竒色舟凝滯於水濱車逶迤於山側擢容與而未前馬寒鳴而不息掩金觴而誰御橫玉柱而霑軾居人愁卧恍若有亡日下壁而沈彩月上軒而飛光見紅蘭之受露望青楸之離霜巡層楹而空掩撫錦幙而虛涼知離夢之躑躅意別魂之飛

揚故別雖一緒事有萬族至若龍馬銀鞍朱軒繡軸帳
飲東都送客金谷琴羽張兮簫鼓陳燕趙歌兮傷美人
珠與玉兮豔暮秋羅與綺兮嬌上春驚駟馬之仰秣聳
淵魚之赤鱗迨分手而銜涕感寂寞而傷神乃有劍客
慙思少年報士韓國趙廁吳宮燕市割慈忍愛離邦去
里瀝泣共訣收血相視驅征馬而不顧見行塵之時起
方銜感於一劍非買價於泉裏金石震而色變骨肉悲
而心死或乃邊郡未和負羽從軍遼水無極鴈山參雲

閨中風暖陌上草薰日出天而耀景露下地而騰文鏡
朱塵之照爛襲青氣之烟煨攀桃李兮不忍別送愛子
兮霑羅裙至如一去絕國詎相見期視喬木兮故里訣
北梁兮永辭左右兮竟動親賓兮淚滋可班荆兮增恨
惟樽酒兮叙悲值秋鴈兮飛日當白露兮下時怨復怨
兮遠山曲去復去兮長河湑又若君居淄右妾家河陽
同瓊珮之晨照共金爐之夕香君結綬兮千里惜瑤草
之徒芳慙幽閨之琴瑟晦高臺之流黃春宮閱此青苔

色秋帳含茲明月光夏簟清兮晝不暮冬缸凝兮夜何
長織錦曲兮泣已盡迴文詩兮影獨傷倘有華陰上士
服食還仙術既妙而猶學道已寂而未傳守丹竈而不
顧鍊金鼎而方堅駕鶴上漢駘鸞騰天暫游萬里少別
千年惟世間兮重別謝主人兮依然下有芍藥之詩佳
人之歌桑中衛女上宮陳娥春草碧色春水綠波送君
南浦傷如之何至乃秋露如珠秋月如珪明月白露光
陰往來與子之別思心徘徊是以別方不定別理千名

有別必怨有怨必盈使人意奪神駭心折骨驚雖淵雲
之墨妙嚴樂之筆精金閨之諸彥蘭臺之羣英賦有
凌雲之稱辯有雕龍之聲詎能摹暫離之狀寫永訣之
情者乎

古詩

古樂府

行行重行行與君生別離相去萬餘里各在天一涯道
路阻且長會面安可知胡馬依北風越鳥巢南枝相去

日已遠衣帶日已緩浮雲蔽白日遊子不顧反思君令人老歲月忽已晚棄捐勿復道努力加飧飯

明月何皎皎照我羅牀帷憂愁不能寐攬衣起徘徊行客雖云樂不如早旋歸

涉江採芙蓉蘭澤多芳草採之欲遺誰所思在遠道還顧望舊鄉長路漫浩浩同心而離居憂傷已終老

庭中有奇樹綠葉發華滋攀條折其榮將以遺所思馨香盈懷袖路遠莫致之此物何足貴但感別今時

贈蘇武別

李陵

良時不再至離別在須臾
屏營衢路側執手野踟躕
仰視浮雲馳奄忽互相踰
風波一失路各在天一隅
長當從此別且復立斯須
欲因晨風發送子以賤軀

同前

李陵

携手上河梁遊子暮何之
徘徊蹊路側悵悵不能辭
行
人難久留各言長相思
安知非日月弦望自有時
努力
崇明德皓首以為期

別李陵

蘇武

雙鳧俱北飛一鳧獨南翔子當留斯館我當歸故鄉一
別如秦胡會見何詎央愴恨切中懷不覺淚沾裳願子
長努力言笑莫相忘

同前

蘇武

征夫懷徃路起視夜何其參辰皆已沒去去從此辭行
役在戰場相見未有期握手一長歎淚為生別滋努力
愛春華莫忘歡樂時生當復歸來死當長相思

別離

陸龜蒙

丈夫非無淚，不洒離別間。
仗劍對樽酒，恥為游子顏。
蝮蛇一螫手，壯士疾解腕。
所恐在功名，離別何足歎。

古別離

趙徵明

為別未幾日，一日如三秋。
猶疑望可見，日日上高樓。
唯見分手處，白蘋滿芳州。
寸心能死別，不忍生離愁。

贈崔純亮別

孟郊

食齋腸亦苦，強歌聲無歡。
出門即有礙，誰謂天地寬。
有

礙非遐方長安大道旁小人智慮險平地生太行鏡破
不改光蘭死不改香始知君子交久之長益彰君心與
我懷離別俱迴遑譬如浸蘖泉流苦日已長忍泣日易
衰忍悲形自傷項籍豈非壯賈生豈非良當其失意時
涕泗各滿裳古人勸加飧此飡難自強一飽九祝噎一
嗟十斷腸况是兒女冤冤氣凌彼蒼彼蒼若有知白日
下清霜今朝始驚呼碧落空茫茫

怨別

孟郊

一別一回老志士髮白早在富易為容居貧難自好沈
憂損性靈服藥亦枯槁秋風客子衣落日行遠道君問
去何之賤身寧自保

汴梁留別韓愈

孟郊

不飲濁水瀾空滯此汴河坐見逸岸水盡為還海波四
時不在家敝服斷線多遠客獨顛顛春莫各婆婆荒陂
饒曲流野桑無直柯但為君子心歎息終匪他

長安留別李觀韓愈因獻張徐州

孟郊

富別愁在顏貧別痛銷骨懶磨舊銅鏡畏見新白髮古
樹春無花子規啼有血離弦不堪聽一聽三四裂世途
非一險俗慮有千結有客步大方驅車獨迷轍故人韓
與李逸翰雙皎潔哀我挫折歸贈詞縱橫設徐方國東
樞元戎天下傑禰生投刺遊王粲吟詩謁高情無遺照
朗抱開曉月有士不埋冤有讎皆為雪願為直草木永
向君地列願為古琴瑟永向君聽發欲識丈夫心曾將

寶刀說

生別難

白居易

食藥不易食梅難藥能苦兮梅能酸未如生別之為難
苦在心兮酸在肝晨雞載鳴殘月沒征馬重嘶行人出
迴看骨肉哭一聲梅酸藥苦甘如蜜黃河水白黃雲秋
行人河邊相對愁天寒野曠何處宿棠梨葉戰風颼颼
生別離憂從中來無斷絕憂積心勞血氣衰未年三十
生白髮

別三子

陳無已

夫婦死同穴父子貧賤離天下寧有此昔聞今見之母
前三子後孰視不得追嗟爾胡不仁使我至於斯有女
初束髮已知生離悲枕我不肯起畏我從此辭大兒學
語言拜揖未勝衣喚爺我欲去此語那可思小兒襁褓
間抱負有母慈汝哭猶在耳我懷人得知

有所思

盧仝

當時我醉美人家美人顏色嬌如花今日美人棄我去

青樓珠箔天之涯
娟娟嫦娥月三五
二八盈又缺翠眉
蟬鬢生別離一望
不見心斷絕心斷
絕幾千里夢中醉
卧巫山雲覺來淚
滴湘江水兩岸花
木深美人不見愁
人心含愁更奏綠
綺琴調高絃絕無
知音美人兮美人
不知為暮雨兮為
朝雲相思一夜梅
花發忽到牕前疑
是君

醉留東野

韓愈

昔年因讀李白杜甫詩
長恨二人不相從
吾與東野生

並世如何復躡二子蹤東野不得官白首跨龍鍾韓子
稍姦黠自慙青蒿倚長松低頭拜東野願得終始如駝蛩
東野不迴頭有如寸莛撞鉅鐘吾願身為雲東野變為
龍四方上下逐東野雖有別離無由逢

律詩

不見

杜甫

不見李生久佯狂真可哀世人皆欲殺吾意獨憐才敏
捷詩千首飄零酒一盃匡山讀書處頭白好歸來

夜與故人別

于武陵

白日去難駐，故人非舊容。
今宵一別後，何處更相逢。
過楚水，千里到秦山。
萬重話來天未曉，月落滿城鐘。

寄南遊弟兄

竇鞏

書來未報幾時還，知在三湖五嶺間。
獨立衡門秋水濶，寒鴉飛去日銜山。

淮上與友別

鄭谷

揚子江頭楊柳春，楊花愁殺渡江人。
數聲羌笛離亭晚。

君向瀟湘我向秦

陽關三疊

見饌送門

絕句

孫冕

亭亭畫舸繫寒潭
直至行人酒半酣
不管烟波與風雨
載將離恨過江南

元相公賓府有薛書能飲酒醉後因爭令擲
注子擊傷相公猶子遂出幕醒來乃作十離
詩上獻或云蜀奴薛濤為連帥所怒作此以

獻

馴擾朱門四五年毛香足淨主人憐無端咬着親情客
不得紅絲毯上眠

右犬離主

越管宣毫始稱情紅箋紙上撒花瓊都綠用久鋒頭盡
不得羲之手裏擎

右筆離手

雪耳紅毛淺碧蹄追風曾到日東西為驚玉貌郎君墜

不得華軒更一嘶

右馬離殿

隴西獨自一孤身飛去飛來上錦茵都緣出去無方便
不得籠中再喚人

右鸚鵡離籠

出入朱門未忍拋主人嘗愛語咬咬銜泥穢汚珊瑚簾
不得梁間更壘巢

右燕離巢

皎潔圓明內外通清光似照水精宮都緣一點瑕相穢
不得終宵在掌中

右珠離掌

戲躍蓮池四五秋常搖朱尾弄輪鈎無端擺斷芙蓉朶
不得清波更一遊

右魚離池

爪利如鋒眼似鈴平原捉兔稱高情無端竄向青雲外
不得君王手上擎

右鷹離主

翁鬱新栽四五行常將貞節負秋霜為緣春笋鑽牆破
不得垂陰覆玉堂

右竹離亭

鑄瀉黃金鏡始開初生三五月徘徊為遭無限塵蒙蔽
不得華堂上玉臺

右鏡離臺

詩話

詠曹顏遠詩

殷浩甥韓伯隨至彼所經歲還都浩送至渚側詠曹顏
遠詩云富貴他人合貧賤親戚離因而泣下

醉中分袂

蕭鳳使玉門闕弟肅勸酒頻頻謂兄曰醉中庶分袂不
悲杜送王判官黔陽信使應稀少莫怪頻頻勸酒盃

奪胎換骨

東坡長短句云無情汴水自東流只載一船離恨向西

州張文潛詩云亭亭畫舸繫春潭只待行人酒半酣不
管煙波與風雨載將離恨過江南王平甫愛而誦之不
知其出於此此奪胎換骨法也

泊宅編

還歸

詳見思鄉門

羣書要語薄言還歸

采繫

言旋言歸

黃鳥

式遄其歸

丞民

還鄉

者心務見家不可以一步至也

劉子

已出反金

叔孫通

傳

出有

賜曰餞路反有勞曰輓脚

楊國忠傳

詩句傲衰反柴荆

陶

新歸且慰意生理焉足說

杜北征

錦

城雖云樂不如早還家

李白

近家心轉切不敢問來人

孤獨

還樂莫樂於還故鄉

坡

踏着家鄉馬脚輕

王建

古今事實

來歸自鎬

薄伐獫狁至於太原文武吉甫萬邦為憲吉甫燕喜既
多受祉來歸自鎬我行永久

衮衣公歸

東山周公東征也九罭周大夫刺朝廷之不知也是以

有袞衣兮無以我公歸兮

馬生角

燕太子丹為質於秦秦不禮乃求歸秦曰待烏頭白馬生角當放子歸太子仰天哭感得烏頭白馬生角秦王

大驚乃遣丹歸

遊歷
記聞

杖節歸漢

見羊
門

彭澤賦歸

見米
門

角巾還第

有往來者言庾公有東下意或謂王公可潛稍嚴以備
不虞王公曰我與元規雖俱王臣本懷布衣之好若其
欲來吾角巾徑還烏衣何所稍嚴

角巾歸里

羊祜與從弟琇曰既定邊事當角巾東路歸故里為容
棺之墟以白士而居重位何能不以盛滿受責乎

本傳

千載來歸

遼東城門華表柱忽有一白鶴少年欲射之乃飛徘徊

言曰有鳥有鳥丁令威去家千載今來歸城郭是人民
非何不學仙塚累累

出神
仙記

置軟脚局

郭子儀自同州歸詔大臣就宅作軟脚局人率三百千

大
唐

古今文集

雜著

歸去來辭

陶潛

歸去來兮田園將蕪胡不歸既自以心為形役奚惆悵
而獨悲悟既往之不諫知來者之可追實迷途其未遠
覺今是而昨非舟搖搖以輕颺風飄飄而吹衣問征夫
以前路恨晨光之熹微乃瞻衡宇載欣載奔僮僕歡迎
稚子候門三逕就荒松菊猶存携幼入室有酒盈樽引
壺觴以自酌盼庭柯以怡顏倚南牕以寄傲審容膝之
易安園日涉以成趣門雖設而常闔策扶老以流憩時
矯首而遐觀雲無心以出岫鳥倦飛而知還景翳翳以

將入撫孤松而盤桓歸去來兮請息交以絕游世與我
以相違復駕言兮焉求說親戚之情話樂琴書以消憂
農人告余以春及將有事乎西疇或命巾車或棹孤舟
既窈窕以尋壑亦崎嶇而經丘木欣欣以向榮泉涓涓
而始流善萬物之得時感吾生之行休已矣乎寓形宇
內能復幾時曷不委心任去留胡為乎皇皇欲何之富
貴非吾願帝鄉不可期懷良辰以孤往或植杖而耘耔
登東臯以舒嘯臨清流而賦詩聊乘化以歸盡樂夫天

命復奚疑

古詩

休假還舊業便使

王維

謝病始告歸依依入桑梓家人相佇立相候衡門裏時
輩今長年成人舊童子上堂嘉慶畢顧與姻親齒論舊
忽餘悲自存且相喜田園轉蕪沒但有寒泉水衰柳日
蕭條秋光清邑里入門乍如客歸騎非便止中飲顧王
程離憂從此始

示三子

陳無已

去遠即相忘，歸近不可忍。兒女已在眼，眉目略不省。喜極不得語，淚盡方一哂。了知不是夢，忽忽心未穩。

還里

陳無已

曠士愛吾廬，遊子悲故鄉。慷慨四方志，老衰但悲傷。虛名自成誤，失得略相當。莫年還家樂，未覺道路長。閭里喜我來，車馬塞康莊。爭前借言色，草木亦晶光。向來千人聚，一老獨徜徉。手開南陽軒，松柏鬱蒼蒼。永願守一

丘脫身萬里航平生功名念倒海浣我腸尚恐北山南
有文移路傍

律詩

秋晚歸故居

李昌符

馬首曾行處連嘶渡晚河忽驚鄉樹出漸識路人多
細徑穿禾黍顏園歷薜蘿乍歸猶似客鄰叟亦相過

送孟六歸襄陽

王維

杜門不欲出久與世情疎以此為長策歡君歸舊廬醉

歌田舍酒笑讀古人書好是一生事無勞獻子虛

還鄉偶書

黃拱

離別家鄉歲月多歸來人事半消磨惟有門前鑑湖水
春風不減舊時波 少小離家老大回鄉音難改鬢毛
衰兒童相見不相識借問客從何處來

歸計

沈存中

住山人少說山多空只年年憶薜蘿不是自心應不信
眼前歸計又蹉跎

歸洛言懷

司馬君實

三十餘年西復東勞生薄宦等飛蓬所存舊業唯清白
不負明時有朴忠早避喧煩真得策未逢危辱好收功
太平觸處農桑滿贏取閭閻鶴髮翁

合并

羣書要語勿疑朋益箴注勿疑則朋合疾也

豫卦

邂逅相

遇野有蔓草脫然若沈疴之去體灑然若執熱之濯清

風也

韓文

詩句江湖十年別衰老一樽同

劉長卿

桃李春風一盃酒

江湖夜雨十年燈

山谷

江山千里俱頭白骨肉十年終眼

青山

山谷

古今事實

傾蓋而語

孔子之剡遇程子於塗傾蓋而語終日甚相親

家語

班荆而食

楚伍舉將奔晉聲子遇之於鄭郊班荆相與食而言注

布荆坐地

左表二十六

刮目相待

魯肅過呂蒙言議常欲受屈拊蒙背曰吾謂大弟但有武略今者學識英博非復吳下阿蒙蒙曰士別三日即更刮目相待

相別一世

張乖崖少與逸人傅霖同學公既顯達求霖三十年不可得有憶霖詩云寄語巢由莫相笑此身終不美輕肥

晚年守宛丘有被褐騎驢叩門大呼曰語尚書青州傅
霖闍吏走白公曰傅先生天下士汝何人敢呼姓名霖
笑曰別子一世尚爾童心是豈知世間有我哉公問昔
何隱今何出霖曰子將亡矣來報子公曰詠亦自知之
霖曰知復何言後一月公薨

古今文集

雜著

聚星亭畫屏贊并序

朱元晦

按世說陳太丘詣荀朗陵貧儉無僕役乃使元方將車季方持杖從後長文尚少載着車中既至荀使叔慈應門慈明行酒餘六龍下食文若亦小坐着膝前于時太史奏真人東行考亭陳氏故有離榭名以聚星蓋取續陽秋語中更廢壞近始作新適通敞廬因得相其役事既又為之本原事迹書着屏上并為之贊以視來者云

猗歟陳子神嶽鍾英文淵懿範道廣心平危孫污隆卷
舒自我是曰庶幾無不可獻身安衆弔孺全邦炯然
方寸秋月寒潭願言懷人曰我同志故朗陵君荀季和
氏連峯對起麗澤潛滋儉而不見有默其思薄言造之
顧無僕役獨呼二兒駕予以出青芻黃犢布幃柴車策
紀前衛杖謔後趨所造伊何高陽之里維時荀君聞至
而喜顧謂汝靖往應于門七龍矯矯布席開尊靖肅而
前翁拜其辱何悟斯晨得見清穆命爽行觴旅饋次陳

獻酬交錯禮度情親載笑載言罔非德義益邁乃猷以
輔斯世髡髻兩稚亦置膝前源深本固莫出匪賢維此
慈明特謝儔匹晚際國屯敢渾濡迹贅旒之命恃以少
延邦朋之最孰與為先郁乃附曹羣亦忘漢嗣守之難
古今共歎崇臺回極予以占天猶曰茲野德星萃焉我
寓有亭舊蒙斯號今刺前聞象儀以告高山景行好德
所同課忠責孝獨慙余衷百爾窺臨鏡老母忘死國承
家永奉明戒

古詩

贈衛八處士

杜甫

人生不相見動如參與商
今夕復何夕共此燈燭光
少壯能幾時鬢髮各已蒼
訪舊半為鬼驚呼熱中腸
焉知二十載重上君子堂
昔別君未婚兒女忽成行
怡然敬父執問我來何方
問答未及已兒女羅酒漿
夜雨剪春韭新炊間黃粱
主稱會面難一舉累十觴
十觴亦不醉感子故意長
明日隔山岳世事兩茫茫

贈史修文


沈千運

故人阻千里會面非別期握手於此地當歡反成悲念
離宛猶昨俄已經於暮疇昔皆少年別來髮如絲不道
舊姓名相逢知是誰曩遊盡騫耆與君仍布衣豈曰無
其才命理應有時別路漸欲少不覺生涕洟

元稹為御史奉使東川於褒城贈黃明府詩
其序云昔年曾於解縣飲酒余為觥錄事嘗
於竇明府廳有一人至頻犯語令連飛十數

觥不勝因逃去醒後問之前虞卿黃丞也此
後絕不復知元和四年三月奉使東川十六
日至褒城驛逡巡有黃明府見迎瞻其形容
髣髴似識問其前銜即曩日逃席黃丞也說
向前事黃生惘然而悟因饋酒一罇艤舟請
余同載余不欲孤其意與之盡歡徧問褒陽
山水則褒如所奔褒城在其左諸葛所征之
路次其右感今懷古作贈黃明府詩曰

昔年曾痛飲黃令困飛觥席上當時走馬前今日迎依
稀迷姓字積漸識平生故友身皆遠他鄉眼暫明便邀
連榻坐魚共刺船行酒思涼風亂霜稜拂地平不省深
淺酌貪愴古今情迤邐七盤路拔地數大城花疑褒女
笑機息武侯征一種埋幽石空聞千載名



古今事文類聚別集卷二十五